

Powalli: 186

02 tonalli tlen abril meetstli ipan 2024 xiwitl

Ni weyitlanawatihkah itlahtolmanawilis, ika achtopa, mokwepaseh ipan masewaltlahtolmeh

- *Tlahtolmanawilis mokwepaseh ipan maya, nawatl wan tsotsil masewaltlahtolmeh*
- *Moyolmelawaseh ni tekitsitsih ika chikwase masewaltlahtolmeh: maya, mixteco, nawatl, ralámuli, tsotsil wan wixárica*

Pampa moixmati motekiwiah tomasewaltlahtolmeh tlen onka ipan ni tlaltokahyotl wan pampa motemowa motlepanitas yolmelawalistli itechpowilis wan tlen nechikolli-wasanilistli tlen Mexiko ewanah masewaltsitsih, ni Weyitekikalko Instituto Nacional Electoral (INE) kitsontlananas, ika achtopa, tlahtolkwepalistli ipan eyi weyitlanawatihkah itlahtolmanawilis ipan maya, nawatl wan tsotsil.

Yani tlachiwalistli tlawel weyi eli pampa Consejo General kichiwa ma nochi tlakakiliseh ni tekitsitsih.

Ika mosenkawa ipan Weyitekikalko Instituto Nacional de Lenguas Indígenas (INALI), ni maya wan nawatl eli ome masewaltlahtolmeh katli achi motlahtoa wan, ika tsotsil, eli katli kinpiah masewalmeh tlen san yani inkamatih ipan totlaltokahyoh.

Ika tlen achtowi, ni INE kiyolmelawas tlahtolmanawilis ika tekitianih tlen kintemowa asitih ipan Presidencia de la República, mochiwas 7 wan 28 tonalli tlen abril meetstli wan 19 tonalli tlen mayo meetstli ipan 2024 xiwitl, mokwepaseh ipan ni eyi tlahtolmeh, ipan icanal tlen YouTube (INETV), wan nohkia ipan ininmasewalmatlatl wan iteposiswatl <https://centralectoral.ine.mx/>.

Yani keh mochiwas, kihtosneki tlahtolkwepalistli eli kema mokwepa tlen moihtowa ipan se tlahtolli nimantsi moihtowa ipan seyok, yani kichiwa se tlahtolkwepketl/ tlahkwilolkwepketl yani itekitl pampa kikmatih ome tlahtolli, kikmatih kikwepas (tlahtolli wan tlahkwilolli) wan nohkia kikwepa wan kiasih ipan seyok tlahtolli.

Nochi tlahtolkwepanik kintlepanitaseh inintekitl

Ipan nochi eyi weyitlanawatihkah itlahtolmanawilis motekiwis ni itlachiyalis, Moitas ma moneltokas nochi tlen kihtoseh tekitianih, nohkia ahkaya kinyekana. Nohkia, itekitl tlen tlahtolkwepanik ika temachtli mosenkawa axkintokiliseh yonse, kichiwaseh ika tsalantik wan san ika tlen moihtos.

Ma moyolmelawas tekitsitsih ika masewaltlahtolnih, mokahokwis inintoskah ipan chikwase yolmelawalistli tlen motlahtolkwepaseh ipan masewaltlahtolmeh: maya, mixteco, nawatl, ralámuli, tsotsil wan wixárica.

Ika ni yolmelawalistli, motemowa ma tsontlananalistli, tlanawatiyanih tlen chinankomeh, tlamachtiyanih, momachtiani wan masewaltsitsih kinitaseh ma ininsenyelis wan nochi masewalmeh tlen ininaltepekoh moyolmelawaseh ni tlahtolmanawilis motlahtolkwepaseh ipan eyi tlahtolmeh tlen achtowi moihtok.

Ni tlahtolkwepalistli katli tlahtolmanawilis tlen weyitlanawatihkah kitemowa ma nochi masewaltsitsih tlen itstokeh ipan chinankomeh nohkia moyolmelawakah tlen ni wasanilistli mochiwas wan kianpa kwalli kikpehpeniseh ahkiya tekitis.

Ika ni, ni INE kisenkawa piltlanawatilli 7 tlen Tlanawatilli Ley General de Derechos Lingüísticos de los Pueblos Indígenas kampa moihtowa ni “masewaltlahtolmeh ipatih, iwikal keh kaxtikahtlahtolli, ika nochi kamanalmeh noso tlamantli tlen masewalmeh, nohkia ma moyolmelawaseh tlen kwaltilolli wan tlen onkah ika masewalmeh yolmelawalistli”.

Nohkia, kisenkawa piltlanawatilli 6 tlen ni tlanawatilli, yani kihtowa “ni Tlaltokahyotl kimoyawas wan kiitas tlen monekis ika temachtli ma nochi yolmelawalistekitiani kinixpantiseh tlen melawak wan tlen miakih tlahtolmeh wan nehnemilistli tlen ni Mexiko Tlaltokahyotl” wan nohkia kisenkawa piltlanawatilli 8 tlen kiixpantia” yonse masewalli welli kinyokachiwaseh san pampa kamatih itlahtol”.

Nohkia, ipan piltlanawatilli 9 moihtowa “eli itechpowilis tlen nochi mexikoeawah moyolmelawas ika itlahtol tlen ipanimah kamatih, axkintsakwiliseh kampa onkah masewalmeh noso kampa iseltik itstos, kema tlahtoa noso kema ihkwiloa, ipan nochi imasewaltekitsitsih, ika tomintlanilistli, ika nechikolistli, ika nehnemilistli, ika teotlahtolli wan tlenwelli seyok”.

Ipan yani, ni INE keh Mexiko Tlaltokayotl itekikalko, kisenkawa tlahtolkwepalistli tlen weyitlanawatihkah itlahtolmanawilis ma mochikawaseh tlahtoltechpowilis tlen altepetsitsih wan masewalchinankomeh, nohkia ma kintlachilikah wan axkinyokachiwakah.

Ni tekikalko tlen kitsontlananah tlahtolkwepalistli eli Chikon Alternativas yani kitemowa moolinis, moyolmelawas wan moixpantis tlen mochiwas ika yehyechiwalistli wan masewalnehnemilis tlen ni tonalli.

-o0o-

**Comunicado de prensa traducido al náhuatl.*